

說文稽古篇卷上

豕害蛇害虎害

說文豨字下云。豕走豨。豨。古有封豨脩蛇之害。按孟子。當堯之時。禽獸逼人。獸蹄鳥跡之道。交於中國。舜使益掌火。益烈山澤而焚之。禽獸逃匿。蓋洪水時代。人與禽獸雜居。故其時有極大之豕。極長之蛇。以爲民害。淮南子。本經訓。逮至堯之時。封豨脩蛇。皆爲民害。乃斷脩蛇於洞庭。擒封豨於桑林。高註。封豨。大豕。脩蛇。大蛇。吞象三年而出其骨。山海經有封豕。註。大豬也。羿射殺之。左傳定四年。吳爲封豕長蛇。以荐食上國。昭二十八年。生伯封。實有豕心。謂之封豕。蓋古時封豨脩蛇。爲人人心目中之所懼。久之遂習爲成語。或爲加於人之綽號也。

說文虞。鬪相夙不解也。豕虎之鬪不相捨。司馬相如說。虞。封豕之屬。按豕至能與

虎鬪。其豕之巨可知。故謂之封豕。

說文它、蟲也。從蟲而長。象冕曲垂尾形。上古草居患它。故相問無它乎。按韓非子、五蠹篇。上古之世。人民少而禽獸衆。不勝禽獸。蟲蛇有聖人作。構木爲巢。以避羣害。章氏文始。上古草居患它。故相問無它乎。引伸遂爲稱彼之詞。藝文類聚引風俗通。無恙。俗說疾也。凡人相見及書問者曰。無疾耶。按上古之時。草居露宿。恙。蟻人蟲也。食人心。凡相勞問者曰。無恙乎。非爲疾也。此與許氏之說。可互相發明。說文虐。殘也。虎足反爪人也。按上古人與虎鬪。虎恆以足傷人。故其製字。虎反爪爲虐。

古人最畏虎爪。說文畏字下云。鬼頭而虎爪可畏也。故畏字從虎爪。

蠱毒

說文蠱。腹中蟲也。春秋傳曰。皿蟲爲蠱。淫溺之所生也。梟磔死之鬼亦爲蠱。按字從蟲從皿會意。皿。器也。卽造蓄蠱毒之法。王氏筠句讀云。苗人行蠱者。聚諸毒蟲。

於一器中。互相噉食。所餘一蟲卽蠱矣。許引皿蟲爲蠱。乃蠱字正義。隋志。江南之地多蠱。以五月五日。取百種蟲。大者至蛇。小者至虱。合置器中。令自相啖。餘一種存之。欲以殺人。因入人腹中。此卽許氏腹中蟲之說也。周禮秋官鄭註引漢賊律。敢蠱人及教令者棄市。漢書公孫敖傳趙破奴傳。皆坐巫蠱族。是漢時此風最盛。周禮庶氏掌除蠱。左傳宣八年。晉胥克有蠱疾。史記秦德公作伏祠。磔狗邑四門。以禦蠱災。是周時蠱已盛行。易有蠱卦。知其來已久。亦不自周始矣。今黔粵苗黎。尙多蓄蠱。蓋猶沿三苗遺俗。

古時犬之多

太古之世多犬。故蒼頡製字。恆從犬取義。茲就說文中擇舉數例。犯侵也。朱駿聲說文通訓定聲云。字本言犬犯人。轉注爲干陵違逆之稱。猝。犬從艸暴出逐人也。按字本言犬暴出驚人。因以爲倉猝之猝。狎。犬可習也。按字本言犬馴。因以爲狎習之狎。

獨、犬相得而鬪也。羊爲羣、犬爲獨也。按字本言犬性獨。因以爲孤獨之獨。

狃、犬性汰也。按字本言犬驕汰。因以爲人之驕汰。

怯、多畏也。朱駿聲云。此字本義。謂犬畏人。因移以言人之怯。

默、犬暫戴侗引唐本作潛逐人也。按字本言犬潛逐人。因以爲緘默之默。

突、犬從穴中暫出也。按字本言犬突出。而以爲人之突出。

獎、嗾犬厲之也。按字本言獎厲犬。而以爲獎厲人之獎。

獲、獵所獲也。按字本言獵犬所獲。因以爲人獲取之獲。

獫、狡獪也。按此以犬之狡獪。爲人之狡獪。

猜、恨賊也。按此以犬之猜忌。爲人之猜忌。

狠、犬鬪聲。按字本言犬狠。而以爲人之狠。

狀、犬形也。按字本言犬形。因以爲人之狀貌。

斃、頓仆也。按字本言犬斃。而以爲人死。

臭字下云。禽走艱而知其迹者犬也。故臭從犬鼻。按字本爲犬艱。而以爲人聞。類字下云。種類相似。惟犬爲甚。按字本言犬之種類。而以爲人之種類。戾犬出戶下身曲戾也。字亦從犬會意。

朱駿聲云。說文缺笑字。笑古從犬。犬狎人聲也。哭亦犬哀聲也。

此外如獷猥猛狂獻等字。均屬此例。推其原因。蓋遊牧時代。惟犬獨多。穴居則畜犬守禦。狩獵則攜犬自隨。因而人必畜犬。遂成風俗。故製字亦恆從犬取義也。犬亦曰狗。曲禮疏。大者爲犬。小者爲狗。說文狗字下云。孔子曰。狗叩也。叩氣吠以守。玉篇。狗家畜以吠守。是狗字本有守訓。左傳。吏人之與叔孫居於箕者。請其吠狗。檀弓。仲尼之畜狗死。此春秋時人皆畜狗之證。易。艮爲狗。九家云。艮止主守禦也。周禮。犬人疏。艮爲止。以能吠守止人則屬艮。是畜犬之俗。遠在邃古以前也。古時拘捕罪人。亦以犬守之。說文獄。确也。從𡗗從言。二犬所以守也。

養豕在溷中

古人最爲不潔。養豕輒在溷中。說文圂、廁也。從口。象豕在口中會意。按一切經音義九引蒼頡篇。圂、豕所居也。晉語。少淩于豕牢。韋註。豕牢、廁也。漢書五行志。豕出圂。顏註。圂者、養豕之牢。武五子傳。廁中豕羣出。壞大官竈。顏註。廁、養豕圂也。三國志引魏略。梟離國王侍婢生子。王捐之溷中。豬以喙噓之。是古皆以養豕之牢爲廁。迄漢魏猶沿此俗。

原人時代。家必養豕。故家從豕。讀爲家者。朱氏以爲從豕省聲是也。惟說文則未及此義云。

疑獄決於解廌

說文廌、刑也。平之如水。從水。廌所以觸不直者去之。從去。廌、解廌獸也。似山牛一角。古者決訟。令觸不直。薦獸之所食草。古者神人以廌遺黃帝。帝曰。何食何處。曰。食薦。夏處水澤。冬處松柏。按山海經。東北荒中有獸。如牛一角。毛青。四足似熊。見人鬪則觸不直。聞人論則咋不正。名曰獬豸。論衡。魃魃者。一角之羊也。性知有罪。

皋陶治獄。其罪疑者。令羊觸之。有罪則觸。無罪則不觸。斯蓋天生一角聖獸。助獄爲驗。故皋陶敬羊。起坐事之。漢書司馬相如傳註。張揖曰。解廌似鹿而一角。人君刑罰得中。則生於朝廷。主觸不直者。續漢書輿服志。法冠。一曰柱後。或謂之獬豸冠。獬豸神羊。能別曲直。楚王常獲之。故以爲冠。漢官儀。秦滅楚。以其冠賜近臣。御史服之。蓋自黃帝至唐虞。凡疑獄皆以解廌決之。必係當日實事。其後不常得。乃以其形爲冠。前清凡執法者。猶用獬豸爲補服云。

刀守井

說文井字下云。八家一井。古者伯益初作井。按御覽一百八十九引周書。黃帝始穿井。是黃帝時已有井。不始於伯益。世本。化益作井。宋衷註。化益。伯益也。堯臣。呂氏春秋。勿躬篇。伯益作井。蓋舊說相傳如是。章氏文始。井雖始伯益。然丹井陷阱。自蒼頡時已有之。故初文有井。

說文刑。罰罪也。從井從刀。按初學記引說文云。刀守井也。飲之人入井。陷於川。刀

守之。割其情也。今本說文佚。又一切經音義二十引春秋元命苞。刑字從刀從井。井以飲人。人入井爭水。陷於泉。以刀守之。割其情。欲人畏慎以全命也。蓋初作井之始。未有井欄。爭水者恆陷其中。故以刀守之。取水者以先後爲序。爭先者有罰。是爲刑罰之始。

持刀詈人有罰

說文罰。罪之小者。從刀從詈。未以刀有所賊。但持刀罵詈則應罰。按初學記。兩言爲詈。刀守詈爲罰。罰之爲言內也。陷於害也。此與刑字皆於字義中發見最古之逸史。

姦淫刼奪之風

莊列之徒。動言太古之世。無爲而治。以說文證之。而知其不然。古時姦淫刼奪之風。固甚盛也。說文毋。止之也。從女有奸之者。王氏筠據曲禮釋文。引說文曰。毋。止之詞也。其字從女。內有一畫。象有姦之者。禁止之勿令姦。古人云毋。猶今人言莫。

也。按古未有婚姻。輒對女子任意肆其強暴。見人之奸女而從旁禁止之。則曰毋。其後凡禁止之詞皆爲毋。

說文安、蟬也。從女在宀中。謂得女而安也。朱駿聲云。飲食男女。人之大欲存焉。寧從宀心皿。飲食之欲也。安從宀女。男女之欲也。

姁。訟也。易睽曰。二女同居。其志不同行。革曰。二女同居。其志不相得。蓋雜婚時代。一男而有二女。則爭起矣。三女爲姁。其誼亦同。

劫。字下云。人欲去。以力脅止曰劫。或曰以力去曰劫。奪字下云。手持佳。失之也。按佳。說文訓爲鳥之短尾者。蓋牧畜時代。獵之所獲。輒爲人奪去。故其製字如此。

交易以物

說文物。萬物也。牛爲大物。故從牛。牛。大牲也。牛。件也。按物件字皆從牛。蓋牧畜時代。人多畜牛。故舉牛以例餘物。

半。物中分也。從八從牛。牛爲物大。可以分也。又分字下云。別也。從八從刀。刀以分

別物也。按古無貨幣。交易恆以牛羊。牛爲物大。不便交易。故以刀分別之。

說文市。買賣所之也。市有垣。從巾從匕。古文及。象物相及也。按物相及。卽以物交易之義。易繫辭。神農氏日中爲市。致天下之人。聚天下之貨。交易而退。各得其所。呂氏春秋。勿躬篇。祝融作市。初學記引風俗通。古者二十畝爲井。因井爲市。後漢書循吏傳注。引春秋井田記云。因井爲市。交易而退。故稱市井。

古市皆有垣。西京賦。廓開九市。通闌帶闔。旗亭五重。俯察百隧。白帖引關市令。諸外蕃與緣邊互市。官司檢校。其市四面穿塹及立籬垣。遣人守門。按關市令爲唐令。是唐時市尙有垣。

龜貝爲貨幣

古人製字。貧貪買賣贈贖賄賂貨資賀貢貸賂賞賚賜負敗貯質費賈販質賕購貲數字。均從貝。說文貝。海介蟲也。居陸名蜃。在水名蜃。象形。古者貨貝而寶龜。周而有泉。至秦廢貝行錢。又具字下云。從升從貝。古者以貝爲貨。按書禹貢。厥篚織

貝。盤庚具乃貝玉。正義貝者水蟲。古人取其甲以爲貨。如今用銀然。尙書大傳文王囚於羑里。散宜生之江淮之浦。而得大貝如車渠以獻。書顧命有大貝。詩巷伯有貝錦。是三代時民間貨幣均用貝。禮器諸侯以龜爲寶。易或益之十朋之龜。崔憬註元龜直二十大貝。古者貝皆言朋。猶今銀之稱兩。錢之稱貫也。詩錫我百朋。箋古者貨貝。五貝爲朋。其價值計算方法。則全載於漢書食貨志。志云元龜距冉長尺二寸。直二千一百六十。爲大貝十朋。公龜九寸。直五百。爲壯貝十朋。侯龜七寸以上。直三百。爲么貝十朋。子龜五寸以上。直百。爲小貝十朋。是爲龜寶四品。大貝四寸八分以上。二枚爲一朋。直二百一十六。壯貝三寸六分以上。二枚爲一朋。直五十。么貝二寸四分以上。二枚爲一朋。直三十。小貝二寸二分以下。二枚爲一朋。直十。不盈寸二分漏度不得爲朋。率枚直錢三。是爲貝寶五品。說文則字下云。等畫物也。從刀從貝。貝古之貨物也。桂氏義證云。謂貝大小有定則。卽上列之貝寶五品是也。

貝一枚亦謂之一員。說文員、物數也。從貝。朱駿聲云。木曰枚。竹曰箇。絲曰總。貝曰員。猶今稱銀一枚爲一圓也。又貝、員形。故圓亦從貝。

說文卣字下云。穿物持之也。從一橫貫。象寶貨之形。貫字下云。錢貝之貫從卣貝。百字下云。數十百爲一貫。知用貝時代。其貝仍穿眼。以繩貫之。

古時貝不特可爲貨幣。且以爲飾。說文賁、飾也。字從貝。賁、頸飾也。從二貝。嬰、頸飾也。從女貝。知古女子以貝飾於頸上。

史記平準書。至秦幣爲三等。而珠玉龜貝銀錫之屬。爲器飾寶藏。不爲幣。是龜貝至秦始皇廢。周雖有泉。而貝仍兼行。周禮職金、貨罰註。貨、泉貝也。此二者兼行之證也。周語。景王二十一年。將鑄大錢。註。錢者金幣之名。古曰泉。後轉爲錢。是春秋時已有錢名。說文錢、銚也。古田器。章氏小學答問。古之鑄錢者。形如契刀。故謂之刀。亦象臬缶。故謂之錢。漢書食貨志。景王鑄大錢。文曰寶貨。則錢面有字。亦自周始。

女生爲姓

說文姓、人所生也。古之神聖母、感天而生子。故稱天子。因生以爲姓。從女生。按說文所列古姓凡十一。姜姬媯嬴姚嬭妘姚嬭嬭妘媯。字皆從女。亢倉子、几籙氏之民。知有母而不知有父。蓋古代未有婚姻以前。姓皆從母。故姓字從女生。此最初之本義也。

姓字之第二義。則以所生之地爲姓。說文、神農居姜水。因以爲姓。黃帝居姬水。因以爲姓。虞舜居姚虛。因以爲姓。虞舜居嬭汭。因以爲姓。按漢人釋因生爲姓有二說。論衡詰術篇、古者因生以賜姓。因其所生賜之姓也。若夏吞薏苡而生。則姓爲苡氏。商吞燕子而生。則姓爲子氏。周履大人迹而生。則姓爲姬氏。此謂以所生之故爲姓也。許氏則以所生之地爲姓。新唐書張說傳、古未有姓。自炎帝之姜黃帝之姬始。因所生地而爲之姓。亦主許氏之說者。許說較勝。

娶婦以昏時

說文婚、婦家也。禮娶婦以昏時。婦人陰也。故曰婚。按古娶婦必以昏時入門。儀禮

士昏禮。婦至卽行三飯三醕之禮。禮畢而燭出。足知其爲昏時。鄭目錄云。士娶妻之禮。以昏爲期。因而名焉。白虎通。嫁娶婚姻者何謂也。昏時行禮。故謂之婚也。所以昏時行禮何。示陽下陰也。

納聘及賀禮用鹿皮

說文麗字下云。禮麗皮納聘。蓋鹿皮也。按儀禮士昏禮。納徵元纁。束帛儷皮。註。儷。兩也。皮。鹿皮。通鑑長編。上古男女無別。伏羲始制嫁娶。以儷皮爲禮。據此知古嫁娶。其聘禮以兩鹿皮。

說文慶。行賀人也。吉禮以鹿皮爲贄。故從鹿省。據此知古賀禮亦用鹿皮。故慶字從鹿會意。

媒

說文媒。謀也。謀合二姓。按風俗通。女媧禱祀神祇。爲女婚姻。置行媒自此始。路史。女媧佐太昊。禱於神祇。而爲女婦。正姓氏。職婚姻。是曰神媒。是婚姻媒妁之制。均

始於女媧。周禮媒氏掌萬民之判。管子入國篇凡國都皆有掌媒。丈夫無妻曰鰥。婦人無夫曰寡。取鰥寡而合和之。是古所謂媒。皆官媒也。燕策周地賤媒爲其兩譽也。之男家曰女美。之女家曰男美。是私媒至周末乃盛行。

古媒官皆每年以仲春之月與民爲媒。說文乳字下云。人及鳥生子曰乳。從孚從乙。乙者玄鳥也。明堂月令玄鳥至之日。祠於高禰以請子。故乳從乙。請子必以乙至之日者。乙春分來秋分去。開生之候鳥。按月令仲春之月玄鳥至。至之日以太牢祠于高禰。註玄鳥燕也。燕以施生時來。巢人屋宇而孚乳。嫁娶之象也。媒氏之官以爲候。高辛氏之世。玄鳥遺卵。娥簡吞之而生契。後王以爲媒官嘉祥而立其祠焉。變媒言禰神之也。然則古不特有媒官。且有媒祠。凡求子者。每年必於燕至之日祠之。

當塗民以辛壬癸甲日嫁娶

說文龠一曰九江當龠也。民以辛壬癸甲之日嫁娶。徐鍇曰。尙書傳禹方治水。以

辛日娶。甲日復往治水。在家三日耳。竊山民其先俗以辛日嫁娶。亦或後人見禹之聖。其後有天下。因以成俗也。

上古稱謂中獨闕兄弟

說文兄、長也。弟、韋束之次弟也。按白虎通、兄、況也。兄況于父。詩、大雅、倉兄填兮。毛傳、兄、茲也。蓋長也。況也。茲也。義略相近。是兄本義不爲兄弟之證也。章氏檢論云。父子君臣夫婦朋友。各有正文。而昆弟獨假於韋束之次弟。其後乃因緣以製孺字。說文兄雖訓長。毛公故訓。義實爲茲。蓋由茲長而爲長者。亦猶令長之引伸矣。斯則兄弟昆弟。古無其文。蓋亦無其語也。其諸庶相謂。則孟仲及季而已。本無兄弟昆弟之名。故亦不製其字。及其立名借字。則文教已隆。必在三王之際也。此論似奇而實確。蓋兄弟二字。在說文爲假借。其本義止訓爲長爲次弟。可證原人時代。本無此語。蒼頡製字時。亦尙未立此名也。

古稱兄弟之女爲姪

說文姪、兄之女也。按姪字從女，故其稱限於女子。釋名：姑謂兄弟之女爲姪。桂氏義證：戴侗曰：今人謂兄弟之丈夫子亦曰姪，非也。古者兄弟之子皆曰子。漢書疏廣與其兄子受：父子并爲師傅是也。趙翼陔餘叢考：俗稱兄弟之子曰姪，非也。凡男子稱兄弟之子，當曰從子。經書所載，未有稱姪者。姪乃兄弟之女也。正韻：兄弟之女曰姪。故姪字從女旁。考晉書謝安傳：安與兄子玄，父子皆著大勳。世說：殷太常父子，所謂父子者，指其兄子浩。是晉時尙未稱從子爲姪。顏氏家訓：兄弟之子，北人多呼爲姪。是此俗始於北朝。漢晉以前，無此稱謂也。

弔喪之禮

說文弔，問終也。古之葬者，厚衣之以薪，從人持弓會毆禽。按吳越春秋：古者人民朴質，死則裹以白茅，投於中野。孝子不忍見父母爲禽獸所食，故作彈以守之，絕鳥獸之害。急就篇顏注：弔，謂問終者也。於字人持弓爲弔。上古葬者，衣之以薪，無有棺槨，常苦禽鳥爲害，故弔問者持弓會之，以助彈射也。西陽雜俎：弔字矢貫弓。